

## VCCT Play

**Wan man hemi wokaboat I kam insaed.**

Nurse: Helo! Helo olgeta! Mi kam blong tokaboat wan nuifala sik we I stap kam antap bikwan long Pacif c ya... [**Ol narafala akta oli stap long audience.**] Mi wandem tokaboat sik ya AIDS...

Ol: AIDS?!

Boe: Mi lez!

Gel: Yumi save long sik ya finis!

Nurse: Yu save long sik ya finis? Yu save evrisamting? [**Hemi wet long wan ansa.**] Okay... bae yu talem long mi hao nao yu kasim sik ya?

Boe: Umm...

Gel: Yu mas kat fulup patna!

Boe: Ol solmit nomo oli stap kasim!

Nurse: Yu tink tink olsem ah? Okay..yu save talem wanem noa sik ya istap mekem long bodi blong yumi? [**Ol boe mo gel behin long bakdrop, oli stap lukim olgeta.**]

Gel: Ahhh! I save mekem yu yu sik ya!

Boe: Bae I kilim yu yu ded!

Nurse: Yes.. be hoa?

Ol: Ummm.....

Nurse: Yu wandem save ol strait ansa long ol kwestion ya?

Gel: Olsem wanem olgeta? Bae yumi lisen long hem?

Boe: Ahhh! Mi no nidim blong save ol samting ya! Mi bae mi no kasim AIDS!

Boe 2: Yu no save!

Boe: Shurrap!

Nurse: Bae yumi traem luk hao nao sik ya I spred mo wanem nao I stap mekem long bodi blong yumi! Yu wandem save?

Gel 2: Yes. Mifala I wandem save!

Boe: Bae yumi ko .. mi no interest long ol samting ya. [**Boe ya hemi stan up olsem we hemi redi blong oat.**]

Nurse: Wet smol! [**Boe hemi stap nao.**] Bae yu stap smol taem nomo.. mo harem ol samting long saed blong sik ya! I kud blong save!

Boe: Ahhh!

Nurse: No kud yu sek wan de.. from yu nao yu kasim sik ya. Yu mas save ol samting long saed blong sik ya AIDS.

Boe: Yu wandem mekem mi mi frate ya!

Nurse: Yumi mas fraet long sik ya fren! Istap spoelem plante man olabaot long wol ya Long South Afrika.. ples blong Luky Dube.. aot long evri fo man... Yufala fo yu kam long ples ya.. [**Hemi karem fo akta I kam tugeta.**] Aot long fo man ya ... *Wan* imas kat pepet blong sik ya AIDS I stap long blud blong hem! [**Hemi puttum wan pepa we I talem AIDS long akta ya.**] Evri 6 secon wan man ikasim sik ya AIDS long wol ya.

Gel : Evri six seconds?

Nurse: Yes! Long Pasifik ya tu, numba blong ol man we I kat sik ya I stap gro! [**Hemi lukim ol boe nao.**]

Boe: Be hao nao bae yumi stoppem sik ya?

Nurse: Yu mas save evrisamting long saed blong sik ya AIDS. Firstaem bae yumi luk luk long hao nao ol narafala sik oli spred..... [**Sam narafala akta oli kam insaed nao.**]

Chorus: Evri ples  
Olabaot long yumi



Nurse: Bae yu luk! [**Oi akta iko bak long position blong olgeta.**] Okay! Fromwaqnem nao yumi no stap kasim ol kaen sik we istap olaboat? ..... [**Audience I ansa, sapos no ol akta.**] Okay! Noa ya bae yumi lukim hao nao sik ya AIDS I ko insaed long bodi blong man.

Boe 2: Mi wan helti strong boe! Mo tunaet.. mi kat tinktink blong ko long tanis... [**Hemi stan up long fored blong wan kiamen mirror mo hemi stap mekem hemi wan iluk nis. Ol pat blong blud oli stap saed saed blong hem, mo oli stap mekem sem samting olsem hem. Afta hemi wokaboat bakagen.**] Tanis ya noa! Lukim ol nisfala gel we I stap! Man.. ohh... gel ya longwe I stap luk luk mi! Chanis blong mi ating!

Chorus: Hey! Yu kat kondom?

Boe 2: Kondom! Mi no stap usum kaen samting olsem ya!

[**Wan long gel I mekem wan sign long boe ya, blong ko behaen long bakdrop wetem hem. Boe 2 hemi folem gel ya behaen long bakdrop. Hemi stap smoltaem. Afta hemi ron ikam aot bakagen.**]

Boe 2: Laki blong mi! Mi finem wan laki blong mi!

[**Tufala wit pat blong blud I ron I kam wetem hem. Be oli stap luk luk roan olsem we oli sek. Wan narafala akta I stap folem olgeta. Boe 2 hemi freeze I stap.**]

AIDS: Hemi bin kivim chanis long mi nao! Hemi ko wetem gel ya, be hemi no usum kondom! Mo mi nao bae mi ko insaed long bodi blong hem!

[**AIDS hemi wokaboat aboat iko. Ol wit pat blong blud oli traem stoppem hem, be oli no save mekem wan samting. AIDS hemi ko stan up behaen long boe 2. Hemi stap toktok slo.**] Mi nao mi stap wetem yu... Ino kat wei blong oatem mi long bodi blong yu, boe. Bae mi stap wetem yu kasim taem yu ded. [**Oli freeze I stap.**]

Nurse: Yu luk wanem we I bin happen? [**Hemi wet long ol ansa.**] Hemi bin kasim sik ya olsem wanem? Ibin fli ikam long win? O hao? [**Hemi wet long wan ansa.**] Yes.. hemi kasim tru long sex. Okay... Hemi kat pepet blong sik ya AIDS I stap long bodi blong hem nao ya. Be hemi sik finis? [**Oli wet long audience blong kivim ansa.**]

Boe 2: Mi no sik! Mi strong nomo istap! Mi save ple football! Mi save wok long karen! Mi save tanis iet! Mi no sik tu! [**Taem we hemi toktok hemi mekem ol mov we I ko wetem toktok ya. Ol wit pat blong blud, wetem sik ya AIDS oli mov wetem hem afta hemi freeze.**]

AIDS: Be mi nao, mi stap wetem hem oltaem...

Nurse: Yumi no save lukim eni sign blong sik long boe ya! Hemi strong I stap..be sik I stap long blud blong hem. Wanem bae iahppen sapos we boe ya I ko finem wan narafala gelfren bakagen? [**Hemi wet long ansa.**] Hemi save passem sik ya long gel ya! Yes!

Chorus: Mo boe ya

Bae hemi helti I stap

Blong plante yia!

Hemi no kat eni sign blong sik

Be pepet blong AIDS I stap long bodi blong hem iet..

Mo slo slo..

Wan samting I stap happen long bodi blong hem!

[**Noa ya AIDS istat blong attakem ol wit pat blong blud we I stap long bodi blong boe 2. Hemi kilim ded wan. Afta hemi kilim ded narawan.**]

Nurse: Pepet blong AIDS I stap mekem wanem long bodi blong boe ya? [**Audience I talem.**] Ova long sam yia sik ya AIDS I stap kilim ded ol soldja blong blud. Mo wanem bae I happen taem we ol soldja ya inomo kat?

Sik 1: Mi nao bae mi kam! [**Hemi wokaboat I kam mo hemi sneeze mo hemi rubbem hed blong hem olsem we hemi feva. Boe 2 hemi mekem olsem taem we sik I kam klosup long hem mo iko insaed long bodi blong hem. AIDS hemi stap klad.**]

Sik 2: Mi tu mi save spoelem hem! Bodi blong hem ino save oatem mifala noa ya! [**Beliron I stap kam mo hem tu iko insaed long bodi blong boe ya.**]

Boe 2: Mi stap feva.. bel blong mi.. Ohh...

Nurse: Yu luk wanem we I happen long boe ya? [**Hemi stap wet long ansa ya.**] Bodi blong hem ino save faetem ol sik we I stap olaboat.

AIDS: Hemia nao wok we mi nao mi stap mekem! Hemi stap kasim ol sik we ol helti man ino stap kasim! Slo slo hemi kam mo sik! Mo mo sik iet! [**Boe I faldoan mo sikya AIDS hemi stan antap long boe ya taem we hemi toktok. Ol narafala akta oli lukim boe ya.**]

Nurse: Wanem bae I happen long hem nao ya? [**Wan long ol kata ya oli ko blong helpem boe mo kivim kakae long hem.**]

Gel 2: Bae hemi ded ino longtaem.

Nurse: Sapos we hemi kakae kud, mo ol fren I stap lukoatem kud hem, hemi save laef sam yia iet. [**Afta everi wan I stap up mo ko long ples blong olgeta**]

Boe: Hemi wan no kud sik be... yumi no kat long ples ya!

Gel: Yumi kat wan kes I stap finis!

Boe: Oli talem se hemi kasim sik ya ovasee! Ino long ples ya!

Nurse: Yu tink se yumi long ples ya, yumi difren long ol narafala ples long wol ya? Yumi mas kat sam mo kes I stap iet. [**Ol aka oli lukim olgeta noa.**] Sik ya AIDS istap olaboat long yumi!

Chorus: Long Fiji!

Long New Caladonie

Papua New Guinea

Australia

New Zealand!

Ikat long kolosup evri kaontri long Pacific

Mo numba blong ol kes ya

I stap ko

Antap!

Nurse: Long 1990, ibin kat wan o tu kes nomo long PNG. Tede nao oli bin finem mo bitim **6000 kes..**

Chorus: Be numba blong man we I kat sik ya AIDS

Hemi mo bikwan iet

From fulup man oli stap karem pepet blong sik ya AIDS

Long bodi blong olgeta

Be oli no save se oli kat sik ya nating!

Boe: Oli stap wokaboat wetem sik ya?

Gel 2: Yu no folem toktok blong fren ya? Oli no save se oli kat sik ya! Oli stap helti olsem yu mo mi. Yumi no save luk save se oli kat sik ya!

Boe 2: AIDS I mas stap long ples ya....

Gel: Sik ya AIDS I stap pass tru long sex. Plante yungfala tede oli kat mo bitim wan partna...

Boe: Ino ol yungfala nomo!

Gel 2: Mi stap wari nao..Olsem wanem sapos we mi nao mi kat sik ya.. long blud blong mi?

Boe: Yu?! Kass!

Gel 2: Eni wan long yumi I save kat sik ya! Yu tu!

Boe: Ino mi! Ko hangem nek!

Nurse: Itru! Yumi no save hu nao I kat sik ya mo hu ino kat. Be yu save finem aot sapos we yu yu kat sik ya ono. Yu save kam test from sik ya long KPH.

Boe 2: Test?! From sik ya!

Nurse: Hemi wan sekret samting sapos we yu kam from wan test olsem. Yu mas kam yu wan nomo. Bifo we yu test from sik bae mifala I tokaboat test ya, blong kivim chanis long yu blong tinktink kud sapos we yu wandem kat test ya ono.

Ol: Test from AIDS??!

Nurse: Yu save kam luk mi long KPH sapos yu wandem... [**Hemi wokaboat iko. Oli wet kasim taem we hemi aot afta oli toktok bakagen.**]

Boe: Ehhh! Bae mi ko ple volley...

Gel: Kam.. bae yumi ko.. toktok ya I mekem skin blong mi iko kol kol!  
[**Hemi ron iko aot. Wan gel mo wan boe I stap long akting aria nomo.**]

Gel 2: Yu tink se yumi shud test from sik ya?

Boe 2: Mi mi stap wari littlebit...

Gel 2: From?

Boe 2: Mi bin folem hed blong mi.. Mi stap pleple long wan football klub. Mifala I bin ko long Santo.. Taem we mifala iko longwe.. mifala istap tri had blong winnim ol match blong mifala. Mifala ibin promis blong no ko aot long naet nating. Mo evride mifala I stap train! [**Taem we hemi toktok gel ya ilos, mo coach hemi kam insaed.**]

Coach: Yufala evriwan! Ten push up! Wan .. tu.. tri. [**Hem iko ahed blong kaont.**]

Boe 2: Ohhh.. man ya I wandem kilim mifala ided!

Coach: Frog jump! Ko ko ko! [**Boe 2 hemi stan up mo hemi pullum win plante.**] Yu save spel nao ya! Be rememba! Tomoro bae yumi ple wan gem we hemi important tumas! Mi no wandem harem se yufala ibin ko oat long naet ya! Yu harem! [**Caoch iko aot.**]

Boe 2: Hmm... Mi mas ko silip erli tunaet! Bikfala gem tumoro... [**Hemi stat blong wokaboat iko. Ikat wan gel we hemi wokaboat ikam wetem sam fren. Oli lukim boe 2 mo oli stap pointem hem. Oli laf. Boe 2 hemi likim olgeta.**]

Gel 1: Hey! Yu noa yu kam ple football!

Boe 2: Yes...

Gel 1: Yu stap ko wer?

Boe 2: Mi? Mi stap ko long haos ya.

Gel 1: Bae yu kam folem mifala!

Boe 2: Be.. mi no save ko oat long naet..

Gel: Yu wan smol pikinini nomo ah?

Boe: Mi stap train!

Gel 1: Yu wan nisfala boe... bae yu kam long klub wetem mifala.. Bae yu kat wan kudfala taem! [**Boe hemi lukim ol afta hemi folem olgeta. Oli ko aot behaen long bakdrop. Afta hemi kam oat bakagen mo hemi faldoan long graon olsem we hemi tronk mo hemi silip. Vois blong coach I kam aot behaen long bakdrop.**]

Coach: Six oclock finis! Taem blong gerrup!

Boe 2: Ohhhhh! Kass! [**Hemi harem hed blong hem I so.**] Ohhhh no...Mi binemkem wanem las naet.. Mi trink! Mo.. Gel ya..

Caoch: Bill! Werum yu! Gerrup nao ya!

Boe 2: Mi mas gerrup.. Caoch bae hemi kross no kud wetem mi... [**Hemi gerrup mo hemi ko puttum shirt blong hem. Hemi stap wokaboat iko be Caoch hemi kam insaed.**]

Coach: Yu bin mekem wanem las naet?

Boe 2: [**Hemi sek.**] Mi?

Coach: Yu tink se mi no save? Yu bin ko trink delit long klub! Mo yu bin stap wetem wan kaen gel we... Gel ya I stap folem ol man we istap long ol fishing bot! Yu bin usum kondom?

Boe 2: Kondom? Mi no bin tinkabaot... Sori coach.. be gel ya ibin afterem mi...

Coach: Bae hemi kivim wan rabis sik long yu ya! [**Boe 2 hemi stan up I stap mo hemi harem no kud.**]

Boe 2: Rabis sik?

Coach: Yu no harem toktok long gonnoreah o sik ya AIDS?

Boe 2: Mi stap harem be.. AIDS ino kat long ples ya...

Coach: Ol man we oli stap long ol bot ya, oli ko long ol ples we sik ya hemi fulup..mo oli stap folem ol woman blong rod!

Boe 2: Hemi bin afterem mi.. Mi no bin wandem folem hem..

Coach: Sathed! [**Hemi stap wokaboat iko.**] Bae yumi lusim gem ya.. from yu yu no save holem tait yu long wan naet! [**Caoch hemi ko aot.**]

Boe 2: Sik ya AIDS istap long kaontri ya mo gel ya... ohh no! Hao nao bae mi save se mi mi oraet? Ahh bae mi nomo tinkabaot! Bae mi traem bes blong mi tede..

[**Hemi ko aot mo ikat nois blong gem I kam long behaen. Ol man oli shout mo singoat. Boe ya hemi ron ikam insaed mo hemi punchim air olsem we hemi klad.**]

Boe 2: Mifala I win! Mi mi mekem wan goal! Mi! [**Hemi stap kwiet.**] Yes.. mifala ibin winnem gem ya.. mi bin klad.. Be nao ya mi stap long taon ya bakagen. [**Gel ikam insaed.**] Afta mi harem toktok blong man ya... Mi stap wari tumas.. mi stap wari se..

Gel 2: Yu save ko long KPH mo finem aot sapos we yu kat sik ya...

Boe 2: Mi no .. mi fraet blong save..

Gel 2: Bae I mo vos blong sidoan mo tinkaboat oltaem... Ating mi bae mi ko test.

Boe 2: Yu? From...

Gel 2: Boefren blong mi hemi stap folem ol gel. Hemi bin kivim wan rabis sik long mi.

Boe 2: Be yu stap wetem hem iet?

Gel 2: No.. mi ronwei long hem. Be sapos we mi finem wan narafala boefren.. mi no wandem spoelem hem, olsem we boe ya ibin spoelem mi. Mi wandem save...

Boe 2: Yes be... Olsem wanem sapos we yu finem aot se yu yu kat sik ya?

Gel 2: Mi mas fraet bikwan..

Chorus: Sapos we yu save se yu kat sik ya

Yu save lukaotem yu wan

Kakae kud, silip erli

No trink tumas

Mekem se imo had long pepet blong AIDS ya

Blong kilim ded ol solja blong blud.

Sapos we yu save yu save lukaotem kud yu wan

Bae yuno passem sik ya tu iko

Long ol narawan.

Gel 2: Mi no wandem kivim sik ya long eni narafala man! [**Hemi stap wokaboat iko.**]

Lukim yu! [**Hemi wokaboat iko oat noa.**]

Boe 2: Mi tu mi wandem ko be... Mi no save .. mi no save se bae mi ko ono... Wanem tink tink blong yu? I kud blong ko test from sik ya AIDS ono?

